



Grad Sarajevo
City of Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
GRADSKO VIJEĆE

ODLUKA
O USLOVIMA I NAČINU DODJELE
„ŠESTOAPRILSKE NAGRADE GRADA SARAJEVA“
(Prijedlog)

Predlagač: Gradonačelnica
Obradivač: Stručna služba gradonačelnice
Grada Sarajeva

Sarajevo, april 2022. godine

Adresa: Hamdije Kreševljakovića 3
71000 Sarajevo, BiH
Tel: +387 33 216 659
Fax: +387 33 205 874
Email: gsgv@sarajevo.ba
Web: gradskovijece.sarajevo.ba



Na osnovu člana 26. stav 1. tačka 2. i tačka 18. Statuta Grada Sarajeva („Službene novine Kantona Sarajevo“, broj 34/08 – prečišćeni tekst), Gradsko vijeće Grada Sarajeva, na ___ sjednici održanoj ___.__.2022. godine, donijelo je

(Prijedlog)

**ODLUKU
O USLOVIMA I NAČINU DODJELE
„ŠESTOAPRILSKE NAGRADE GRADA SARAJEVA“**

POGLAVLJE I – OPĆE ODREDBE

Član 1.

(Predmet Odluke)

- (1) Ovom odlukom određuju se uslovi za dodjelu „Šestoaprilske nagrade Grada Sarajeva“ (u daljnjem tekstu: Nagrada), postupak i način dodjele Nagrade, organ koji provodi postupak po raspisanom Javnom pozivu i utvrđuje prijedlog dobitnika Nagrade, oblik i izgled Nagrade, i druga slična pitanja vezana za postupak, uslove i načine dodjele Nagrade.

Član 2.

(Oblasti u kojima se Nagrada dodjeljuje)

- (1) Nagrada iz člana 1. ove odluke dodjeljuje se kao najviše društveno priznanje za značajna ostvarenja i značajne rezultate rada u oblastima:
- a) privrede
 - b) nauke i obrazovanja
 - c) kulture i umjetnosti
 - d) sporta
 - e) zdravstva i socijalne zaštite
 - f) drugim oblastima rada i stvaralaštva, bez obzira na godinu ostvarenja, a koji doprinose ukupnom unapređenju, promociji i razvoju Grada Sarajeva, kao glavnog grada Bosne i Hercegovine i Federacije Bosne i Hercegovine

Član 3.

(Značajna ostvarenja)

- (1) Pod značajnim ostvarenjima, u smislu ove odluke, podrazumijeva se djelovanje i rezultati ostvareni u kontinuitetu koji se smatraju doprinosom razvoju odgovarajuće oblasti, u skladu s kriterijima uobičajenim za konkretnu oblast, a koja doprinose ukupnom razvoju, odnosno promociji Grada Sarajeva.

Član 4.

(Kriteriji)

- (1) Kriteriji za dodjelu nagrade su:
- a) za pojedince i grupe
 - dobrotvorno, humanitarno, socijalno, edukativno, i drugo djelovanje namijenjeno većem broju korisnika, građana Bosne i Hercegovine kojima su uskraćena politička, građanska ili ljudska prava, socijalno isključenih, marginaliziranih ili ugroženih društvenih grupa unutar Bosne i Hercegovine, a putem kojih je Grad Sarajevo pozitivno promoviran;
 - donatorski, humanitarni i sponzorski portfolio za društveno-korisne aktivnosti;
 - izuzetan doprinos u odbrani države Bosne i Hercegovine;
 - postizanje značajnih rezultata u oblasti nauke, obrazovanja, zdravstva, socijalne zaštite, kulture, sporta, amaterskog stvaralaštva i drugih društvenih djelatnosti ili najboljih rezultata u teorijskom i praktičnom radu na pojedinom području javnog djelovanja;

- doprinos unaprjeđenju radnih procesa kreativnim radom ili inovacijama;
 - dobivanje domaćih i međunarodnih priznanja za vlastite inovacije;
 - objavljivanje, prikazivanje, izlaganje, izvođenje ili prezentovanje na neki drugi način vlastitih ostvarenja značajnih za širu zajednicu;
 - ugled i visoke moralne vrijednosti.
- b) za pravna lica
- društveno-odgovorno djelovanje u kontinuitetu, uz puno poštivanje zakonskih normi, prava radnika i dokazanu brigu za zajednicu;
 - upošljavanje većeg broja radnika;
 - ostvarivanje značajne dobiti u poslovanju;
 - vršenje znatnijih ulaganja u proširenje proizvodnih i drugih kapaciteta;
 - postizanje poslovnih uspjeha na nivou međunarodnih standarda;
 - najmanje pet godina postojanja i kontinuiranog djelovanja;
 - renome uzornog pravnog lica.

POGLAVLJE II – POSTUPAK DODJELE, KRITERIJI I IZUZEĆA

Član 5.

(Javni poziv)

- (1) Dodjela Nagrade vrši se objavljivanjem Javnog poziva za predlaganje kandidata za dodjelu Nagrade, a koji upućuje Odbor za dodjelu „Šestoaprilske nagrade“ (u daljnjem tekstu: Odbor), imenovan odlukom Gradskog vijeća Grada Sarajeva.
- (2) Javni poziv se objavljuje u sredstvima javnog informisanja i zvaničnoj web stranici Grada Sarajeva i ostaje otvoren 45 dana, računajući od dana posljednje objave.
- (3) Javni poziv će putem nadležne Stručne službe za poslove Gradskog vijeća Grada Sarajeva biti dostavljen strukovnim udruženjima (Udruženje poslodavaca Federacije BiH, advokatska komora, Udruženje zdravstvenih radnika, kao i strukovnim sindikatima).

Član 6.

(Dobitnici Nagrade)

- (1) Nagrada se dodjeljuje:
 - a) Pojedincu;
 - b) Grupi (okupljenim pojedincima na realizaciji određenih poslova s rezultatima koji se mogu razmatrati u kandidaturi za dodjelu Nagrade kao značajna ostvarenja, odnosno značajni rezultati rada);
 - c) Kolektivu (privrednom društvu, ustanovi, udruženju i drugom pravnom subjektu s područja Grada Sarajeva, kao i onom van područja Grada Sarajeva, ako se njihova ostvarenja, odnosno rezultati rada odnose na Grad Sarajevo).

Član 7.

(Izuzeća)

- (1) Nagrada se ne može dodijeliti organima uprave svih nivoa vlasti u Bosni i Hercegovini, izabranim funkcionerima, poslanicima, vijećnicima svih nivoa vlasti u Bosni i Hercegovini i njihovim srodnicima za vrijeme trajanja njihovog mandata, kao ni zaposlenima u organima uprave svih nivoa vlasti Bosne i Hercegovine za ostvarenja koja se odnose na djelovanje u okviru djelokruga posla koji vrše u organu uprave.
- (2) Nagrada se ne može dodijeliti ni kandidatima protiv kojih se vodi krivični postupak, kao ni kandidatima koji su osuđeni pravosnažnom odlukom nadležnog suda.

POGLAVLJE III – IZGLED, SADRŽAJ I TERMIN DODJELE NAGRADE

Član 8.

(Izgled Nagrade – Povelja)

- (1) Nagrada se dodjeljuje u obliku Povelje, uz novčani iznos koji Odlukom utvrđuje Gradsko vijeće Grada Sarajeva na prijedlog Administrativne komisije.
- (2) Kada se Nagrada dodjeljuje grupi, svaki član grupe dobiva Povelju.
- (3) Novčani dio nagrade iz stava 1. ovog člana raspoređuje se članovima grupe na jednake dijelove.

Član 9.

(Sadržaj Povelje)

- (1) Povelja iz člana 8. stav 1. i 2. Odluke sadrži sljedeći tekst: „BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, GRAD SARAJEVO“, sa suhim grbom Grada Sarajeva, centriranim na vrhu stranice formata A3.
- (2) Ispod teksta iz stava 1. ovog člana ispisuje se sljedeći tekst: „Na osnovu Odluke Gradskog vijeća Grada Sarajeva o dodjeli „Šestoaprilske nagrade Grada Sarajeva“, broj _____, dodjeljuje se „ŠESTOAPRILSKA NAGRADA GRADA SARAJEVA“ (tekst na sredini Povelje), ime i prezime lica, odnosno imena članova grupe ili naziv kolektiva kojima se Nagrada dodjeljuje.
- (3) Ispod teksta iz prethodnog stava ovog člana ispisuje se kratko obrazloženje, odnosno navodi oblast rada i stvaralaštva u kojoj je dobitnik Nagrade ostvario značajne rezultate.
- (4) U donjem lijevom uglu Povelje je oznaka datuma, mjesta i broja Odluke, a u donjem desnom uglu je potpis gradonačelnika/ce Grada Sarajeva.
- (5) Uz Povelju se uručuje i Odluka Gradskog vijeća Grada Sarajeva o dodjeli „Šestoaprilske nagrade Grada Sarajeva“ za odgovarajuću godinu, kojom se utvrđuje vrsta i sadržaj Nagrade, dobitnik Nagrade, te naznaka da se Nagrada uručuje od strane gradonačelnika/ce Grada Sarajeva i predsjedavajućeg Gradskog vijeća Grada Sarajeva na svečanoj sjednici Gradskog vijeća.

Član 10.

(Ograničenja)

- (1) U jednoj godini može se dodijeliti najviše šest Nagrada, iz svake oblasti po jedna, bez obzira da li se radi o pojedinačnoj, grupnoj ili kolektivnoj Nagradi.
- (2) Nagrada se istom licu, iz člana 6. Odluke može dodijeliti samo jedanput.

Član 11.

(Termin dodjele Nagrade)

- (1) Nagrada se dodjeljuje svake godine i uručuje 6. aprila na Svečanoj sjednici Gradskog vijeća.
- (2) Samo izuzetno, u slučajevima vanrednih nepredviđenih okolnosti, kao što su stanje elementarne i druge nesreće, i drugim sličnim nepredviđenim situacijama, Nagrade se mogu uručiti u drugom terminu, o čemu odlučuje Kolegij Gradskog vijeća na prijedlog predsjedavajućeg Gradskog vijeća.
- (3) Nagradu uručuje gradonačelnik/ca Grada Sarajeva i predsjedavajući Gradskog vijeća Grada Sarajeva.

POGLAVLJE IV – PREDLAGANJE KANDIDATA I RAD ODBORA

Član 12.

(Predlaganje kandidata)

- (1) Pravo predlaganja kandidata za Nagradu imaju privredna društva, ustanove, udruženja građana, grupe od najmanje 200 građana i druga pravna lica sa područja Grada Sarajeva, kao i raniji dobitnici „Šestoaprilske nagrade Grada Sarajeva“.
- (2) Subjekti iz stava 1. ovog člana nemaju pravo isticanja sopstvene kandidature za Nagradu.
- (3) Prijedlog iz stava 1. ovog člana podnosi najviši kolektivni organ upravljanja, skupština ili Upravni odbor, odlukom tih organa o podnošenju prijedloga kandidata za Nagradu, s tim da je uz prijedlog dužan dostaviti pismenu saglasnost kandidata da prihvata kandidaturu, jasno definisati oblast za koju se kandidat predlaže te dostaviti i relevantnu dokumentaciju da se protiv kandidata ne vodi krivični postupak i da nije osuđivan.
- (4) Kandidata za dodjelu Nagrade ne mogu predložiti upravljačke strukture pravnih i fizičkih lica sa kojima je interesno povezan.
- (5) Pravo predlaganja kandidata za Nagradu ima i gradonačelnik/ca Grada Sarajeva.

Član 13.

(Sadržaj prijedloga)

- (1) Prijedlog iz stava 3. člana 12. Odluke dostavlja se u tri (3) primjerka sa detaljnim podacima i obrazloženjem i potrebnom dokumentacijom.
- (2) Obrazloženje treba da sadrži podatke o kandidatu, ukupan radni opus i posebne zasluge u oblasti zbog kojih se kandidat predlaže za dodjelu Nagrade.

Član 14.

(Odbor)

- (1) Gradsko vijeće Grada Sarajeva imenuje Odbor iz člana 5. Odluke, i to najkasnije na oktobarskoj sjednici Gradskog vijeća.
- (2) Odbor iz člana 1. ovog člana čini ukupno 13 (trinaest) članova, i to 7 (sedam) članova Komisije za izbor i imenovanja Gradskog vijeća i 6 (šest) članova iz reda istaknutih javnih djelatnika iz oblasti:
 - c) privrede;
 - d) nauke i obrazovanja,
 - e) kulture i umjetnosti;
 - f) sporta;
 - g) zdravstva i socijalne zaštite;
 - h) drugih oblasti rada i stvaralaštva za koje se Nagrada dodjeljuje.
- (3) Članovi Odbora iz reda istaknutih javnih djelatnika mogu biti i raniji dobitni „Šestoaprilske nagrade Grada Sarajeva“.
- (4) Kolegij Gradskog vijeća Grada Sarajeva kandidira Komisiji za izbor i imenovanja kandidate za članove iz reda istaknutih javnih djelatnika iz prethodnog stava.
- (5) Komisija za izbor i imenovanja utvrđuje prijedlog i upućuje ga Gradskom vijeću Grada Sarajeva na razmatranje i usvajanje.
- (6) Predsjedavajući i zamjenik predsjedavajućeg Odbora se biraju na prvoj sjednici Odbora.
- (7) Mandat članova Odbora iz reda istaknutih javnih djelatnika traje do okončanja postupka izbora laureata za tu godinu.

Član 15.

(Poslovnik o radu Odbora)

- (1) Odbor iz prethodnog člana ove odluke, na prvoj sjednici donosi Poslovnik kojim se uređuje način rada Odbora, a posebno se definiše tajnost rada Odbora i imena kandidata za dodjelu do donošenja konačne odluke Gradskog vijeća o dodjeli Nagrade.
- (2) Poslovníkom iz prethodnog stava ovog člana uredit će se i zajedničko razmatranje predloženih kandidata od strane članova Odbora, u dvije sjednice prije procesa glasanja, kao i način glasanja Odbora bodovanjem u drugom ili trećem krugu, i to tako da kandidat koji ostvari minimalan broj bodova većine od ukupnog broja članova Odbora, dakle sedam (7) članova Odbora, ne može biti predložen Gradskom vijeću na konačno odlučivanje.

Član 16.

(Nadležnost Odbora u pogledu prijedloga)

- (1) Ukoliko Odbor u toku postupka za dodjelu „Šestoaprilske nagrade Grada Sarajeva“ utvrdi da predloženi kandidat ispunjava uslove za neku drugu oblast, Odbor može predložiti da se o njegovoj kandidaturi glasa u drugoj oblasti.

Član 17.

(Postupak pred Odborom)

- (1) U prvom krugu članovi Odbora glasanjem utvrđuju liste kandidata koji zadovoljavaju uslove propisane Odlukom i Javnim pozivom u pojedinačnim oblastima.
- (2) U drugom krugu glasanja Odbor primjenjuje način bodovanja preciznije utvrđen Poslovníkom o radu te Gradskom vijeću predlaže najmanje dva (2) prvorangirana kandidata, ako ih je bilo dva ili više, u suprotnom jednog ukoliko je jedan kandidat dobio minimalan broj bodova većine od ukupnog broja članova Odbora ili ni jednog ukoliko kandidat/i nije/su dobio/li nijedan bod.
- (3) Gradsko vijeće donosi konačnu Odluku tajnim glasanjem na sjednici Gradskog vijeća zatvorenoj za javnost.
- (4) Ukoliko je član Odbora na bilo koji način povezan sa predloženim kandidatima za dodjelu „Šestoaprilske nagrade Grada Sarajeva“, obavezan je izuzeti se prilikom glasanja.

Član 18.

(Postupak sa prijedlozima koji ne ispunjavaju uslove)

- (1) Ukoliko Odbor ocijeni da određeni prijedlog kandidata ne ispunjava uslove za dodjelu nagrade, Odbor može uputiti inicijativu prema ovlaštenim predlagačima, gradskim vijećnicima, gradonačelniku/ci, da podnesu prijedlog za dodjelu drugog priznanja ili nagrade Grada Sarajeva, u skladu sa Odlukom o priznanjima i nagradi Grada Sarajeva.

Član 19.

(Tajnost u radu Odbora)

- (1) Članovi Odbora se obavezuju na tajnost svih podataka o kandidatima.
- (2) Članovi Odbora se obavezuju da neće davati izjave u medije ili preko društvenih mreža, sve do zvanično upućenog prijedloga Gradskom vijeću Grada Sarajeva.
- (3) Član za kojeg se utvrdi da je prekršio obaveze iz stava 1. i stava 2. ovog člana, trajno se isključuje iz rada Odbora, o čemu odluku donosi Gradsko vijeće Grada Sarajeva i istovremeno imenuje drugog člana odbora umjesto isključenog člana.

POGLAVLJE V – ODUZIMANJE NAGRADE I POSTHUMNA DODJELA

Član 20.

(Postupak oduzimanja Nagrade)

- (1) Nagrada koja se dodjeljuje pojedincu, odnosno grupi, može se oduzeti nakon dodjeljivanja iste.
- (2) Pod oduzimanjem Nagrade podrazumijeva se oduzimanje Povelje pojedincu, odnosno članu grupe.
- (3) Nagrada se oduzima ako je nagrađeno lice pravosnažnom sudskom presudom osuđeno od Međunarodnog suda za ratne zločine počinjene na teritoriji bivše Jugoslavije, ili koje je pravosnažnom sudskom presudom, od bilo kojeg suda sa područja Bosne i Hercegovine, osuđeno za krivično djelo protiv života i tijela na kaznu zatvora od najmanje godinu dana, protiv slobode i prava građana, protiv dostojanstva osobe i morala, protiv imovine, protiv pravosuđa, protiv službene i druge odgovorne dužnosti, protiv osnova društvenog uređenja i sigurnosti.
- (4) Nagrada se može oduzeti ako je nagrađeno lice pravosnažnom sudskom presudom osuđeno na kaznu zatvora preko 3 (tri) godine ili težu kaznu, a ne radi se o krivičnom djelu iz prethodnog stava.

Član 21.

(Oduzimanje Nagrade)

- (1) O oduzimanju nagrade odlučuje Gradsko vijeće Grada Sarajeva.
- (2) Odluka o oduzimanju Nagrade objavljuje se u „Službenim novinama Kantona Sarajevo“ i sredstvima javnog informisanja, kao i na zvaničnoj web stranici Grada Sarajeva.

Član 22.

(Posthumna dodjela Nagrade)

- (1) Ukoliko priznanje, odnosno Nagrada nije uručena dobitniku za života, predaje se članovima uže porodice (bračni drug, djeca i roditelji) i o tome se izdaje potvrda.

POGLAVLJE VI – PRELAZNE ODREDBE

Član 23.

(Naknada)

- (1) Članovi Odbora imaju pravo na naknadu.
- (2) Visina naknade iz stava 1. ovog člana se utvrđuje na isti način kao i za ostala radna tijela Gradskog vijeća, a na prijedlog Administrativne komisije Gradskog vijeća.

Član 24.

(Finansijska sredstva)

Sredstva za dodjeljivanje Nagrade, kao i sredstva za rad Odbora, obezbjeđuju se u Budžetu Grada Sarajeva i Odluci o izvršenju Budžeta.

Član 25.

(Mandat članova Odbora)

Mandat članova Odbora prestaje usvajanjem izvještaja o radu Odbora od strane Gradskog vijeća Grada Sarajeva.

Član 26.

(Stručni i administrativni poslovi)

Stručne i administrativne poslove za potrebe Odbora, kao i evidencije o dodijeljenim Nagradama, vrši Stručna služba za poslove Gradskog vijeća Grada Sarajeva.

Član 27.

(Gramatička terminologija)

Gramatička terminologija korištenja muškog i ženskog roda u ovoj odluci podrazumijeva uključivanje oba roda.

POGLAVLJE VII – ZAVRŠNE ODREDBE

Član 28.

(Prestanak važenja dosadašnje Odluke)

Danom stupanja na snagu ove odluke prestaje da važi Odluka o uslovima i načinu dodjele „Šestoaprilske nagrade Grada Sarajeva“ („Službene novine Kantona Sarajevo“, broj 28/19).

Član 29.

(Stupanje na snagu Odluke)

Ova odluka stupa na snagu narednog dana od dana objavljivanja u „Službenim novinama Kantona Sarajevo“.

PREDSJEDAVALAČI GRADSKOG VIJEĆA

Jasmin Ademović

Broj:
Sarajevo;

OBRAZLOŽENJE

PRAVNI OSNOV

Pravni osnov za donošenje Odluke sadržan je u članu 26. stav 1. tačka 2. i tačka 18. Statuta Grada Sarajeva („Službene novine Kantona Sarajevo“, broj 34/08 – prečišćeni tekst) kojima je propisano da Gradsko vijeće Grada Sarajeva donosi odluke, druge propise i opće akte i daje njihovo tumačenje, kao i da donosi odluke o priznanjima i nagradama Grada Sarajeva..

RAZLOZI DONOŠENJA

Programom rada Gradskog vijeća Grada Sarajeva za 2021. godinu, broj: 01-GV-02-1281/20 od 30.12.2020. godine, broj: 01-GV-02-195/21 od 24.02.2021. godine i broj 01-GV-02-742/21 od 30.06.2021. godine, kao jedna od tema programirana je i tema – Nacrt Odluke o uslovima i načinu dodjele „Šestoaprilske nagrade Grada Sarajeva“.

Postupajući shodno naprijed utvrđenoj obavezi, a na osnovu prijedloga, primjedbi i sugestija datih kroz Izvještaje Odbora za dodjelu „Šestoaprilske nagrade Grada Sarajeva“ koje su dostavljene Stručnoj službi gradonačelnice Grada Sarajeva, i to:

- i) Izvještaj broj:04-GV-02-363-1/20 od 09.03.2020. godine;
- j) Izvještaj broj: 04-GV-02-424-1/20 od 16.03.2020. godine;
- k) Izvještaj broj: 04-GV-02-229-2/21 od 05.03.2021. godine;

sačinjen je Nacrt predmetne Odluke.

U tekst Nacrta ovog akta uvršteni su prijedlozi, primjedbe i sugestije Odbora, a izvršeno je i uređivanje pojedinih članova i njihovo dodatno unutrašnje uređivanje kroz razvrstavanje u stavove, a sve radi bolje preglednosti i lakše praktične primjene akta, kao što je urađeno kod člana 5., člana 9., člana 14, i drugih članova Nacrta akta.

Također, a poučeni situacijom u vezi sa nemogućnošću održavanja Svečane sjednice Gradskog vijeća u 2021. godini, na dan kako je to važećom Odlukom regulisano, u Nacrt akta, odnosno u član 11. stav 2. Nacrta uvršten je novi stav 2. kojim se propisuje koje su to okolnosti uslijed kojih se održavanje svečane sjednice može pomjeriti za drugi termin u odnosu na onaj utvrđen stavom 1. ovog člana.

Primjedbe Odbora koje nisu uvrštene u tekst Nacrta su:

- primjedba u Izvještaju, broj: 04-GV-04-229-2/21 od 05.03.2021. godine, pod rednim brojem 5., iz razloga što predlagač smatra da se ovo pitanje treba riješiti kroz širu javnu raspravu koja će uslijediti nakon što Gradsko vijeće Grada Sarajeva Nacrt Odluke uputi u javnu raspravu.
- primjedba u Izvještaju, broj: 04-GV-02-363-1/20 od 09.03.2020. godine, pod rednim brojem 5., iz razloga što se ova i slična pitanja regulišu Poslovnikom o radu Odbora i trebaju predstavljati obavezan sadržajni dio objavljenog Javnog poziva.

JAVNA RASPRAVA

Gradsko vijeće Grada Sarajeva, na Šestoj sjednici Gradskog vijeća održanoj 29.09.2021. godine, razmatralo je Nacrt predmetne Odluke i uputilo ga u javnu raspravu u trajanju od 60 dana sa utvrđenim subjektima javne rasprave: klubovi gradskih vijećnika, radna tijela Gradskog vijeća Grada Sarajeva i drugim subjektima koji iskažu interes.

U periodu trajanja javne rasprave nije bilo primjedbi, prijedloga i sugestija na Nacrt Odluke, a što je predstavljalo i jedan od razloga da se sačeka određeni period sa utvrđivanjem Prijedloga Odluke. Pored toga, ocijenjeno je da bi bilo svrsishodno sačekati i formiranje Odbora za dodjelu „Šestoaprilske nagrade Grada Sarajeva“ u 2022. godini kako bi se i na taj način omogućilo sačinjavanje što kvalitetnijeg teksta Odluke obzirom na realna očekivanja da će Odbor imati određene prijedloge u tom smislu.

Dopisom Gradskog vijeća Grada Sarajeva, broj: 01-GV-04-450/22 od 15.03.2022. godine, gradonačelnici Grada Sarajeva dostavljen je daljnje postupanje Izvještaj sa 26. sjednice Komisije za izbor i imenovanje Gradskog vijeća Grada Sarajeva, broj: 04-GV-02-449-5/22 od 15.03.2022. godine,

sa zaključkom Komisije kojim sugeriše predlagaču da razmotri sve primjedbe, prijedloge i sugestije kao prilog javnoj raspravi na Nacrt Odluke o uslovima i načinu dodjele „Šestoaprilske nagrade Grada Sarajeva“.

U prilogu izvještaja dostavljene su primjedbe, prijedlozi i sugestije g. Igora Baroša i g. Ahmeda Imamovića, kao i gradskih vijećnika Nihada Uka i Adija Škaljića ispred Kluba vijećnika Naše stranke u Gradskom vijeću Grada Sarajeva.

Što se tiče primjedbi, prijedloga i sugestija g. Igora Baroša, očigledno je da su dostavljene primjedbe, prijedlozi i sugestije date u odnosu na važeću Odluku koju je Odbor primjenjivao tokom rada u 2022. godini, odnosno na prijedloge, primjedbe i sugestije koje je u odnosu na važeću Odluku dao Odbor za dodjelu „Šestoaprilske nagrade Grada Sarajeva“ u 2021. godini, a ne na utvrđeni Nacrt Odluke.

U tom smislu g. Baroš je predložio da članovi Odbora mogu biti „tri dobitnika Nagrade“.

Ovaj prijedlog je na određen način već uvršten u član 14. Nacrta Odluke, obzirom da je stavom (3) tog člana Nacrta Odluke predviđeno da „Članovi Odbora iz reda istaknutih javnih djelatnika mogu biti i raniji dobitnici 'Šestoaprilske nagrade Grada Sarajeva'“.

Što se tiče ostalih primjedbi, prijedloga i sugestija g. Baroša, iste se odnose na pitanja koja će biti uređena Poslovníkom o radu Odbora.

Dostavljena zapažanja g. Ahmeda Imamovića se u jednom dijelu ne mogu posmatrati u smislu primjedbi, prijedloga i sugestija na Nacrt Odluke, već po svojoj sadržini predstavljaju zapažanja i mišljenja u odnosu na prijavljene kandidate.

Što se tiče prijedloga da se oblast kulture i umjetnosti precizira, uz uvažavanje iznesenih stavova, predlagač je stava da je način na koji je ova oblast navedena u članu 2. Nacrta Odluke „c) kulture i umjetnosti“, prihvatljiv.

Gradski vijećnici Nihad Uk i Adi Škaljić, ispred Kluba vijećnika Naše stranke u Gradskom vijeću Grada Sarajeva, podnijeli su sljedeće prijedloge:

- Da su u tekst Odluke uvrsti da se važećim smatraju prijave koje su poslone na dan koji je naveden kao zadnji u konkursu.

Prijedlog ne može biti prihvaćen iz razloga što je Nacrtom Odluke propisano da Javni poziv ostaje otvoren 45 dana, računajući od dana posljednje objave. Također, prethodno bi bilo i u suprotnosti sa načinom na koji se inače vrši računanje i praćenje rokova u situacijama kada su u pitanju prijemi akata ove ili druge vrste. Naravno, ukoliko je prijava poslana putem pošte na dan koji je u Javnom pozivu naveden kao krajnji rok za prijem („zaključno sa“), ta će se prijava smatrati predanom u propisanom roku.

- Da se Javni poziv pošalje strukovnim udruženjima (udruženje poslodavaca, advokatska komora, udruženje zdravstvenih radnika, strukovni sindikati).

Prijedlog je prihvaćen i uvršten u član 5. stav (3) Prijedloga Odluke.

Što se tiče podnesenog prijedloga koji se odnosi na krug dobitnika nagrade (g. Baroš smatra da je propisano važećom Odlukom prihvatljivo, dok Klub vijećnika Naše stranke smatra (kao i Odbor u ranijem sazivu) da broj nagrada treba smanjiti na način da ih bude ukupno dvije: jedna za kolektive, a druga za pojedince, predlagač materijala je i u Obrazloženju Nacrta Odluke naveo da se u konkretnom slučaju radi o pitanju koje se treba riješiti kroz širu javnu raspravu u kojoj, kao što je i navedeno, nije bilo niti jedne primjedbe, prijedloga ili sugestije.

Ovo je i razlogom što u Prijedlogu ove odluke nisu urađene promjene bilo koje vrste u odnosu na naprijed navedene prijedloge, mišljenja i sugestije.

FINASIJSKA SREDSTVA

Sredstva potrebna za realizaciju Odluke obezbjeđuju se u Budžetu Grada Sarajeva.